

# Il Pandamobil – dapi 30 onns sin viadi

LR a WWF, maun in maun – ina chaussa sco crudada dal tschiel

■ (anr/grc) Il Pandamobil, la stanza da scola ambulanta dal WWF Svizra, festivescha quest onn ses 30avel anniversari. En occasiun da quest giubileum e cunvegnet a la nova exposiziun «Natira a l'autezza», ch'è deditgada a la ritgezza natirala en las Alps, cumpara il dossier pedagogic accompagnond per l'emprima giada en tuttas quatter linguas nazionalas.

La locuziun: «Stai defenda...» saja en il temps dad oz strusch pli actuala, ha manegià Martin Mathiuet, collavuratur da la Lia Rumantscha (LR), ier a Cuir a chaschun d'ina conferenza als meds da massa. La collavuraziun da LR cun Pandamobil, surtut sponzurada da la Migros, sco che Anita Mazzetta ha fatg a savair, «è per nus sco ina chaussa crudada dal tschiel», ha ditg Martin Mathiuet cun intenziun. Tgi che ha gia dastgà far ina visita al Pandamobil cun las diversas attracziuns che midan mintga dus onns, sco scolast, sco scolar u sco genitur ha senza dubi en regurdanza questas exposiziuns ambulantas genialas dal Pandamobil preschentadas durant trais decennis da Michel Terrattaz ed el ha manegià ier a Cuir a curt e bain: «Jau na sun anc betg stanchel da far mia lavur, perquai che jau resent l'entusiassem d'uffants e creschids.»

## Daventar conscient da nossa rizzetga natirala

A partir dal mars 2008 fin la fin 2009 va la nova exposiziun dal Pandamobil Natira a l'autezza en turnea tar las scolas. L'exposiziun tematisescha la ritgezza natirala da las Alps. Ils uffants da scola da 9 fin 12 onns pon sa fatschentar cun la natira davant porta, cun sia ritgezza e las influenzas che periclite-



Michel Terrettaz sin via cun il Pandamobil, Anita Mazzetta dal WWF Grischun e Martin Mathiuet da la LR a chaschun da la orientaziun als meds da massa (da san.).

FOTO G. R. CANTIENI

schan quella, sco er cun la dumonda, co els pon midar lur cumportament ed uschia gidar a mantegnair questa ierta natirala particulara.

Las Alps tutgan tar las 200 ecoregiuns las pli impurtantas ch'il WWF ha definì per diminuir la sperdita da la biodiversità en l'entir mund. Cun 30 000 spezias d'animals e 4500 spezias da plantas en las Alps in reservuar impurtant da biodiversità en l'Europa. «Probablmain na san betg

blers e bleras, tge ierta natirala preziusa ch'è avant maun en las Alps e tge responsabladad che nus avain per mantegnair quella», è persuadida Anita Mazzetta, manadra da fatschenta dal WWF Grischun. Il Pandamobil Natira a l'autezza è perquai ina campagna da sensibilisaziun fitg impurtanta. «Pertge be quai ch'ins conuscha en in era pront da mantegnair.»

Il dossier pedagogic che accompagna il Pandamobil edescha il WWF

quest onn da giubileum per l'emprima giada en tuttas quatter linguas nazionalas. Il WWF resguarda uschia cunvegnet a la diversità natirala era la diversità linguistica da la cuntrada alpina.

La LR sustegna cumplainamain questa tenuta che corresponda er a si'atgna strategia. «Quest engaschament dal WWF è exemplaric per concepir purschidas en in conturn pluriling», manegia Martin Mathiuet, sco

manader da scola e furmaziun e comember da la direenziun da la LR.

La Lia Rumantscha engrazia al WWF per quest engaschament. «En il senn d'ina instrucziun variada e moderna recumonda la Lia Rumantscha a las scolas da far diever da l'exposiziun dal Pandamobil e dal dossier pedagogic», uschia Mathiuet vinavant.

Il Pandamobil sco er il manaschunz ed animatur Michel Terrettaz è dapi 30 onns sin viadi en Svizra. En in vegl auto da vendita da la Migros vegn preschentà a moda ludica ed interactiva mintga dus onns in nov tema davart l'ambient. Dapi il 1978 ha il Pandamobil fatg prest quatter giadas il viadi enturn il mund, visità 16 000 classas e beneventà passa 300 000 scolaras e scolaras sco era 55 000 creschids en tut las quatter regiuns linguisticas da la Svizra. L'animatur Michel Terrettaz è suenter 30 onns anc adina fitg motivà per la lavur cun ils uffants. «Els èn mia motivaziun, pertge lur avegnir dependa da noss cumportament envers l'ambient.»

Il Pandamobil è in project da model da l'educaziun ambientala. Las exposiziuns en la stanza da scola ambulanta èn onn per onn svelt reservadas, uschia er la nova purschida. Il WWF ha dentant reservà il mais da zercladur per visitas en il Grischun, per quest project la regiun prioritara dal WWF. Magistras e magisters interessads ston però far prescha, sch'els vulan reservar il Pandamobil davart la biodiversità en las Alps per quest mais u per l'onn proxim.

Reservaziuns tar WWF Svizra, post regional Svizra romanda: [service-info@wwf.ch](mailto:service-info@wwf.ch) u 022 939 39 90